

Viši zamjenik visokog predstavnika pozdravio zvaničan početak rada Državnog suda BiH

U svom obraćanju danas predsjedniku i sudijama Državnog suda BiH, kao i predstavnicima državnih i entitetskih institucija i međunarodne zajednice, viši zamjenik visokog predstavnika i šef Odjeljenja za vladavinu zakona Bernard Fassier naglasio je da "građani BiH konačno imaju vodeću sudsku instituciju u koju mogu imati povjerenja, instituciju koja neće pasti pod ničiju kontrolu, sa sudijama koji se neće moći potkupiti, tužiocima koji se neće moći zastrašiti i svjedocima koji neće biti dovedeni u opasnost". Otvaranje ovog Suda označava prekretnicu u uspostavljanju vladavine zakona u BiH.

Ambasador Fassier je podsjetio na prvi govor koji je u maju prošle godine visoki predstavnik Paddy Ashdown održao u Parlamentu BiH, kada je rekao da: "bez vladavine zakona ništa drugo što želimo postići neće biti moguće". Viši zamjenik visokog predstavnika je danas podsjetio da će "posao suda biti da primjenu svu silu zakona na one koji su opljačkali resurse BiH, kupili njene institucije i opljačkali njene građane".

On je pozdravio i angažman Vijeća ministara BiH, koje je omogućilo prenos prostorija u kojima se danas nalazi sud na organ BiH. Shodno tome, sud raspolaže odgovarajućim prostorijama koje su mu potrebne u borbi protiv međuentitetskog i međunarodnog kriminala, organiziranog kriminala i, vremenom, u procesuiranju ratnih zločina. Ambasador Fassier je također pozdravio činjenicu da su vlade Španije i Sjedinjenih Američkih Država pružile finansijsku i tehničku podršku ovome Sudu, podijelivši trošak za osiguranje

privremenih prostorija, te donaciju Evropske komisije u iznosu od dva miliona eura koja će biti korištena za osiguranje stalnih prostorija za ovaj Sud. Iz ove donacije će se finansirati renoviranje još jedne sudske zgrade na istoj lokaciji.

Podsjetivši da će Sud BiH igrati suštinsku ulogu u oblikovanju budućnosti BiH, viši zamjenik visokog predstavnika je rekao da će "buduće generacije građana BiH prepoznati ulogu Suda u stavljanju tačke na rat i izgradnji bolje, evropske budućnosti za ovu zemlju".